

■ COLUMNA

La sentupada cul luf

DA GION CAVIEZEL

La catscha ei tier nus ina tradiziun familiara. Mia emprema flenta dubla hai jeu survegni da bab. Liunga conna, da color cutta, la buis stat bein el maun. In gi survegn miu fegl quella flenta. Ussa po bab buca pli, mintgaton va el aunc a catscha bassa, forsa porta el ina lieur ni ina uolp a casa.

Vus saveis tgei ch'ei munta dad esser in catschadur. Quels dalla Bassa e quels fanatics – schinumai tierschützer – manegian che nus mondien mo grad quellas treis jamnas e settien tut quei che semova. Ed ussa aunc quei huara luf. L'entira selvaschina ei disturbada. Il tschierv va buca pli las vias disadas e sezuppa en loghens nunenconuscents.

Mintgaton, sche jeu hai observau in animal, hai jeu giu il sentiment sco sch'els savessen che jeu seigi cheu. Aschia sco els patertgavan: aha, ussa miran els puspei, gie, cun nus va ei



bein, nus havein avunda da magliar. Tut en uorden.

Ussa ei nuot pli en uorden: il luf. Ed aunc mender: quels tierschützers, gnanc in plaid romontsch dat ei per quels.

Oz, da damaun marvegl, ei era aunc stgir, sun jeu ius si mises, segir duas uras a pei, l'aria ferdeva da bulius e tiara humida. Il pastg era bletschs, jeu udevel mo mes pass, ils utschals e miu flad. Il tschiel haveva quei clarblau cuort avon ch'il suleagl passi sur il horizont Ed jeu hai spitgau, hai vuliu mirar sch'ils camutschs passien forsa il crap. Jeu hai encu-

retg cul perspectiv l'entira vart. Ei era grev da veser enzatgei, dapertut aunc quei stgir-blau-ner cuort avon che l'alva cumpara. Nuot. Jeu emprovel aunc ina gada, la garvera, lu in tec engiu, forsa en quella runtga. Ussa, na, quei ei mo l'umbriva d'in crap. Aunc inagada, gie, leu semova enzatgei, in camutsch, gie, ed ussa stat el eri, aulza il tgau, mira entuorn.

Ha el udiu zatgei? Fredda el mei? Na, quei ei bunamein buca pusseivel, il vent stat buns per mei. Tut ei ruasseivel. El maglia empau jarva, lu interrumpa el, spetga e pren aunc ina bucca pleina.

Nus sevesin puspei il settember, tratgel jeu e less schon ir anavos. Cheu, in moviment sut il crap, ei quei pusseivel? Tras il perspectiv mirel jeu directamein els egls d'in luf. Jeu sun segirs, el sa che jeu sun cheu. Ussa fa el in segn cun il tgau. Aschia sco sch'el schess: Jeu s'audel era cheu ed era nus sevesin il settember.